



## Rosa Hitz - Deragisch, Sedrun

\* 30-08-1915 † 11-07-02

Ils 13 da zercladur 2002 han parents, enconuschents ed in pievelun assistiu al survetsch di-  
vin funeral ed accumpignau alla fossa sin san-  
teri da s. Vigeli la defuncta Rosa Hitz-Deragisch.  
En la Val Tujetsch eisi admirabel co tons e tons  
prendan peda e muossan la duida reverenza  
viers nos morts cun prender aschi stediamein  
part tier las sepulturas a quels che han dau  
adia al mund terrester per serender ella per-  
petnidad. Tier la Rosa Manuela, sco ella vegne-  
va numnada, cun sia amicabladad e saun hu-  
mor viers enconuschents ed jasters ei la pre-  
senza tier il cumiau semussada pir che mai.

La Rosa ei naschida ils 30 d'uost 1915 a Se-  
drun/Gionda sco feglia da Emanuel Deragisch e Tresa, naschida Schmid. Ensem-  
ben cun 6 soras ed in frar eis ella carschida siado el ravugl d'in menaschi da scrinaria e  
leutier in pign puresser sco quei ch'ei era il cass pli baul quasi tier mintga famiglia.

Igl onn 1943 marida la defuncta il giuven Sep Lurenz Hitz e lur lètg vegn benedida  
cun 8 affons, 2 buobs e 6 buobas. Tgei truscha e lavur che 8 affons han dau per ina  
mumma sa mintgin s'imaginar sez. La Rosa ha mai schau stermentar ed adina man-  
teniu sia buna luna e siu bien humor ed era giu peda da segidar tscheu e leu cura  
ch'ei deva ina caschun. Gie, la Rosa fageva bunamein risdar la crappa e per ella deva  
ei buca dumiasti ni jasters. Ei vegneva risdau cun in e scadin che mussava attenzion  
ed interess da sia persuna. Legria e contentientscha ha la defuncta gudiu en famiglia  
e cun ils ses.

Era ils dis da tristezia e malencurada ha la defuncta nuota schau stermentar. Ina  
greva frida ei senza dubi la prematura mort da siu mariu che ha bandunau il terrester  
gia igl onn 1977 stada e lu naturalmein la mort da sia beadia Tanja. Cun sia nunbal-  
ucconta cardientscha ha ella surmontau il cuolm a moda simpatica e cun smarvegl.  
La defuncta selegrava oravontut dallas visetas dils ses ed ella era loscha dad esser  
tatta da 19 beidis e saver turschar e trafficar cun tals sco sch'ei fuss ils agens. Era  
naveva ella tschaffen da paterlar sur dil curriu e passau ed era da vegnir sissu novitads  
modieras. Insumma, la Rosa Manuela ha adina giu bugen cumpignia ed encuretg  
cuntact da serisdar cun vischins, enconuschents ed era hospes dalla Val Tujetsch. Cura

ch'ella era memia ditg persula, quei che vegneva denton fetg darar avon, sesenteva ella bandunada ed empau isolada.

Siu hobi preferiu era senza dubi siu iert ed oravontut sias fluras en iert sco era sin las crunas da sia casa paterna. Contas uras ei la defuncta stada en curtin ed ha tgirau ed admirau sias bellezia flurs ed ins astga dir senza surfar ch'ella ha onns ora giu il pli bi curtin da flurs ella Val Tujetsch. In tal hobi sa ins mo admirar e ludar. Saver ludar la scaffiziun sin tala moda ei zatgei niebel ed admirabel e mereta senza dubi nies laud. Ch'in tal hobi ha mantenui sia sanadad e gidau la defuncta a vegnir sin in'aulta vegliadetgna ei caussa clara.

La cara defuncta ha denton era mussau carezia per siu mariu, ses affons e ses beadis e sutbeadis. En sia veta ha la famiglia adina occupau igl emprem plaz. Sia buontad, sia carezia, sia cordialitat, igl esser cheu per ils auters, ha ella dau vinavon a tut quels che han astgau esser en sia vischinonza. Quella carezia che ella ha adina regalau, ei turnada anavos sin ella. Sia famiglia, ses affons han carezau la buna mumma, fatg bien cun ella ed era giu quitau dad ella.

Sur Alexi ha detg denter auter en siu bi riug da bara ils suandonts plaids: Dieus ha dau ad ella quei ch'ella ha duvrau per viver, quei che ha fatg sia veta custeivla e singulara. Dieus ha schau sentir ella sia buontad e carezia. La veta dalla defuncta Rosa Manuela ei stada sco ina flur, ei carschida, vegnida gronda, ha fluriu, derasau odur e legria, purtau fretg - ed ussa vegnida stauncia e passa e sflurida.

Nuslein engraziar alla defuncta per tut quei ch'ella ha dau a nus e per tut quei ch'ella ha fatg per nus. Tut quei vegn a restar en buna memoria.

Rosa Manuela, rauissa en pasch.

Norbert Vinzens